

Judith Ling, 37 aña na servicio di BNA

Muchanan di antes tabata lesa mas



ORANJESTAD – Recientemente, Biblioteca Nacional Aruba (BNA) su sucursal na San Nicolas a tene su reapertura den un edificio totalmente renoba. Sra. Judith Ling ta un empleado encarga di e seccion di adulto, kende tin 30 aña atendiendo cu e clientenan di pariba di brug. Pero den total, e tin 37 aña trahando cu BNA.

Olivia Figaroa tin 35 aña trahando como bibliotecaria. Actualmente e ta traha na Oranjestad y e ta encarga cu e tarea di lanta diferente skina di buki pa e muchanan di bario na MFA. Pero ora cu el a cuminsa traha como bibliotecaria na BNA, tabata su colega Judith Ling esun cu a gui'e riba e sistema cu Aruba tabatin, ya cu na Hulanda tabatin totalmente otro sistema. A pesar cu nan no ta traha directamente hunto, nan a keda yuda y sostiene otro den nan trabou.

Mas motivacion

Nan a keda encanta cu e trabou di renobacion di e edificio di BNA San Nicolas y nan ta spera cu e por haya su balor den comunidad y cu e por ta bon uza pa e muchanan di e distrito aki y bisindario. Tin un variedad di buki tanto clasico como nobo no solamente pa muchanan sino pa adulto tambe. Tambe tin un sala di computer. E biblioteca aki a haya hopi buki nobo y esaki a bira un magnet pa hala atencion di mas publico.

Nan ta mira cu e muchanan ta hopi contento cu nan ta bek den nan luga. Logicamente e ta mira cu tin un diferencia entre e muchanan cu antes tabata bishita e biblioteca cu esun nan di awor. Nan ta haya cu antes e muchanan tabata lesa mas hopi. "Awe dia manera nan yega prome cos cu nan ta punta ta: Unda e computer room ta?" Ling no ta haya nada malo



den esey, te hasta e mir'e como un desaroyo hopi positivo. Sinembargo, e lesamento di buki ta keda importante, ya cu esey ta e meta pe.

Como bibliotecaria, Figaroa su pensamiento pa motiva mas amor pa lesamento cerca nos muchanan ta, cu nan

mester bay den bario. Biblioteca no mester keda mara na un edificio aunque e edificio ta bunita y confortabel. "Nos mester bay cerca nan tambe," el a bisa.

E entusiasmo mester keda cerca tur empleado di biblioteca pa sigui lesa



tambe y asina recomenda e buninan y trece informacion cerca e muchanan. E ta un forma pa contagia e muchanan cu e gana di lesamento di buki. Lesamento di buki ta keda sumamente importante pa e formacion y educacion di un persona durante nan bida. Nan a invita tur mucha di San Nicolas y bisindario pa bishita e biblioteca aki totalmente renoba y cu un lift cu si ta traha. Nan ta organisa actividad pa e muchanan, pero e adultonan tambe por disfruta di e instalacion di e biblioteca aki. Tambe unabes cu nan ta caba di bishita e biblioteca, nan por probecha pa duna un ronchi na San Nicolas y disfruta di e bunita arte pinta riba e murayanan den e mesun area ey.

